

VENDIM
Nr.1253, datë 2.7.2008

PËR PËRCAKTIMIN E KRITEREVE DHE TË PROCEDURAVE TË VLERËSIMIT
PËR DËMSHPËRBLIMIN E PËRFITUAR NGA ISH-TË DËNUARIT POLITIKË TË
REGJIMIT KOMUNIST

Në mbështetje të nenit 100 të Kushtetutës dhe të neneve 6 e 34 të ligjit nr.9831, datë 12.11.2007 “Për dëmshpërblimin e ish-të dënuarve politikë të regjimit komunist”, me propozimin e Ministrit të Drejtësisë, Këshilli i Ministrave

VENDOSI:

I. Ministria e Drejtësisë, Ministria e Financave, Enti Kombëtar i Banesave dhe Zyra Qendrore e Regjistrimit të Pasurive të Paluajtshme, në bashkëpunim, kanë bërë përllogaritjet e masës së dëmshpërblimit financiar, si më poshtë vijon:

A) Në rastin e përfitimit pasuror, në të holla dhe letra me vlerë

1. Çdo kërkues, brenda 10 (dhjetë) ditëve nga marrja e njoftimit për shqyrtimin në themel të kërkesës së tij nga Ministria e Drejtësisë, plotëson formularin e vetëdeklarimit për përfitimet, në të holla ose letra me vlerë, të marra prej tij me ligje të mëparshme.

2. Formulari i vetëdeklarimit është sipas modelit të përcaktuar në aneksin 1, që i bashkëlidhet këtij vendimi. Ai i dërgohet kërkuesit nga Ministria e Drejtësisë, së bashku me njoftimin për shqyrtimin në themel të kërkesës.

3. Ministri i Drejtësisë, pas mbërritjes së formularit të plotësuar nga ish-i dënuari politik ose i afërmi i tij, i dërgon Ministrisë së Financave një kopje të formularit të plotësuar dhe i kërkon të verifikojë përfitimet, në të holla dhe letra me vlerë, të ish-të dënuarit politik nga ligjet e mëparshme.

4. Ministria e Financave, pasi verifikon përputhjen e formularit të vetëdeklarimit me të dhënat e ish-Bankës së Kursimeve (aktualisht Raiffeisen Bank), i dërgon Ministrisë së Drejtësisë përgjigjen zyrtarë për masën e zbritshme të dëmshpërblimit, brenda 30 ditëve nga depozitimi i kërkesës. Përgjigjja formulohet sipas tekstit në vijim:

“Pas verifikimit dhe përllogaritjeve të kryera nga institucioni ynë, ju informojmë se masa e zbritshme është _____ lekë, si përfitim i marrë nga ligje të mëparshme, nga ish- i dënuari politik z/znj _____.”.

ose

“Pas verifikimit të kryer nga institucioni ynë, ju informojmë se masa e zbritshme është _____ lekë, si përfitim i marrë nga ligje të mëparshme, nga ish- i dënuari politik z/znj _____. Kjo shumë është e barabartë me shumën e deklaruar nga vetë kërkuesi, sepse të ne nuk ka të dhëna. “.

B) Në rastin e përfitimit pasuror, në formën e pasurive të paluajtshme

1. Çdo kërkues, brenda 10 (dhjetë) ditëve nga marrja e njoftimit për shqyrtimin në themel të kërkesës së tij nga Ministria e Drejtësisë, plotëson formularin e vetëdeklarimit për përfitimet, në pasuri të paluajtshme, të marra prej tij me ligje të mëparshme.

2. Formulari i vetëdeklarimit është sipas modelit të përcaktuar në aneksin 2, që i bashkëlidhet këtij vendimi. Ai i dërgohet kërkuesit nga Ministria e Drejtësisë, së bashku me njoftimin për shqyrtimin në themel të kërkesës.

3. Ministri i Drejtësisë, pas mbërritjes së formularit të plotësuar nga ish-i dënuari politik ose i afërmi i tij, u dërgon Entit Kombëtar të Banesave dhe Zyres Qendrore të Regjistrimit të

Pasurive të Paluajtshme nga një kopje të formularit të plotësuar dhe u kërkon të verifikojnë përfitimet në pasuri të paluajtshme nga ish-të dënuarit politikë me ligjet e mëparshme.

4. Enti Kombëtar i Banesave dhe Zyra Qendrore e Regjistrimit të Pasurive të Paluajtshme, pasi verifikojnë, secila, përputhjen e formularit të vetëdeklarimit me të dhënat arkivore që kanë, i dërgojnë Ministrisë së Drejtësisë përgjigje zyrtare për masën e zbritshme të përfitimit.

5. Enti Kombëtar i Banesave dhe Zyra Qendrore e Regjistrimit të Pasurive të Paluajtshme, brenda 30 ditëve nga data e depozitimit të kërkesës, i japin përgjigje, sipas tekstit në vijim:

“Pas verifikimit dhe përlogaritjeve të kryera nga institucioni ynë, ju informojmë se masa e zbritshme është _____ lekë, sipërfitim i marrë nga ligje të mëparshme.”.

ose

“Pas verifikimit të kryer nga institucioni ynë, ju informojmë se masa e zbritshme është _____ lekë, si përfitim i marrë nga ligje të mëparshme, nga ish- i dënuari politik z/znj _____. Kjo shumë është e barabartë me shumën e deklaruar nga vetë kërkuesi, sepse te ne nuk ka të dhëna.”.

II. Paraqitja në Ministrinë e Drejtësisë e formularëve të vetëdeklarimit nga ish-të dënuarit politikë apo të afërmit e tyre kryhet, brenda territorit të vendit, vetëm me anë të Postës Shqiptare, sh.a. Për kërkuessit me vendndodhje jashtë vendit, dorëzimi i këtij formulari kryhet nëpërmjet shërbimit konsullor përkatës. Punonjësi përgjegjës e përfshin këtë formular në dosjen individuale përkatëse.

III. Pas marrjes së përgjigjes nga Ministria e Financave, Enti Kombëtar i Banesave dhe Zyra Qendrore e Regjistrimit të Pasurive të Paluajtshme, Ministria e Drejtësisë bën zbritjen e masës së përcaktuar prej tyre nga shuma e dëmshpërblimit, e përlogaritur sipas nenit 6 të ligjit nr.9831, datë 12.11.2007 “Për dëmshpërblimin e ish-të dënuarve politikë të regjimit komunist”, dhe pasi harton listën emërore të përfituesve dhe përcakton masën e dëmshpërblimit përfundimtar për secilin, e paraqet për shqyrtim dhe miratim në Këshillin e Ministrave.

IV. Ritrajtimi i kërkesave, të shqyrtuara para këtij vendimi

1. Për kërkesat e paraqitura në përputhje me pikat 1, të shkronjave “A” e “B” të këtij vendimi, për të cilat ka përfunduar shqyrtimi administrativ në datën e hyrjen në fuqi të këtij vendimi, Ministria e Drejtësisë njofton menjëherë kërkuessin për plotësimin dhe dërgimin e formularëve të vetëdeklarimit, duke i dërguar edhe kopje të tyre. Në këto raste, kërkuessi dërgon, në mënyrën e përcaktuar në pikën II, formularët e plotësuar, brenda 5 (pesë) ditëve nga data e marrjes së njoftimit nga Ministria e Drejtësisë.

2. Pas mbërritjes së formularëve të plotësuar, Ministri i Drejtësisë, u kërkon Ministrisë së Financave, Entit Kombëtar të Banesave dhe Zyrës Qendrore të Regjistrimit të Pasurive të Paluajtshme verifikimin e menjëherëshëm dhe pëllogaritjen e masës së dëmshpërblimit, që ish-të dënuarit politikë kanë përfituar me ligjet e mëparshme. Këto institucione, brenda 10 (dhjetë) ditëve nga data e marrjes së kërkesës, japin përgjigje zyrtare, sipas teksteve të përcaktuara në këtë vendim.

V. Ngarkohen Ministri i Drejtësisë, Ministri i Financave, drejtori i Entit Kombëtar të Banesave dhe kryeregjistruesi i Pasurive të Paluajtshme të Republikës së Shqipërisë për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Sali Berisha

ANEKSI 1
FORMULAR VETËDEKLARIMI
“Mbi përfitimet në të holla dhe letra me vlerë”

Të dhënat e vetëdeklaruesit:

Mbiemri, emri	
Atësia, amësia	
Datëlindja	
Vendlindja	
Dokumenti i identifikimit (një kopje bashkëngjitur formularit)	
Mbiemri, emri i ish-të dënuarit politik	
Numri dhe data e dosjes individuale	
Libreza e depozitimit të letrave me vlerë (një kopje bashkëngjitur formularit)	

Deklaroj me vullnetin tim të lirë se:

- ☐ kam/kemi përfituar dëmshpërblim në të holla në shumën _____ lekë;
(Shuma në numra dhe fjalë)
- ☐ kam/kemi përfituar dëmshpërblim në letra me vlerë në shumën _____ lekë;
(Shuma në numra dhe fjalë)
- ☐ nuk kam/kemi përfituar dëmshpërblim as në të holla dhe as në lekë.

DEKLARUESI

Emër, mbiemër / nënshkrim

Autorizim. Deklaroj se të dhënat e paraqitura në këtë formular janë të vërteta dhe autorizoj kontrollin e vertetësisë së tyre nga Ministria e Financave.

Nënshkrimi i deklaruesit

Vendi dhe data e nënshkrimit

Shënim. Trajtimi të dhënave personale në vijim të përdorimit të këtij autorizimi do të bëhet vetëm në përputhje me ligjin nr.8517, datë 22.7.1999 “Për mbrotjen e të dhënave personale”.
Deklarimi i rremë shkakton përgjegjësi penale sipas ligjit dhe passjell përjashtimin tuaj nga çdo procedurë e mëtejshme.

ANEKSI 2
FORMULAR VETËDEKLARIMI

“Mbi përfitimet në pasuri të paluajtshme”

Të dhënat e vetëdeklaruesit:

Mbiemri, emri	
Atësia, amësia	
Datëlindja	
Vendlindja	
Dokumenti i identifikimit (një kopje bashkëngjitur formularit)	
Mbiemri, emri i ish-të dënuarit politik	
Numri dhe data e dosjes individuale	
Titulli i pronësisë mbi pasurinë e paluajtshme (një kopje bashkëngjitur formularit)	

Deklaroj me vullnetin tim të lirë se:

☐ kam/kemi përfituar dëmshpërblim për dënimin e padrejtë politik banesë/apartament / lokal/tokë, në vlerën _____ lekë të reja në kohën e përfitimi.
(Shuma në numra dhe fjalë)

☐ nuk kam/kemi përfituar dëmshpërblim as në të holla dhe as në lekë.

DEKLARUESI

Emër, mbiemër / nënshkrim

Autorizim. Deklaroj se të dhënat e paraqitura në këtë formular janë të vërteta dhe autorizoj kontrollin e vërtetësisë së tyre nga Ministria e Drejtësisë nëpërmjet Entit Kombëtar të Banesave dhe Zyrës Qendrore të Regjistrimit të Pasurive të Paluajtshme.

Nënshkrimi i deklaruesit

Vendi dhe data e nënshkrimit

Shënim. Trajtimi të dhënave personale në vijim të përdorimit të këtij autorizimi do të bëhet vetëm në përputhje me ligjin nr.8517, datë 22.7.1999 “Për mbrotjen e të dhënave personale”.

Deklarimi i rremë shkakton përgjegjësi penale sipas ligjit dhe passjell përjashtimin tuaj nga çdo procedurë e mëtejshme.